

COLLECTIVITE TERRITORIALE DE CORSE

ASSEMBLEE DE CORSE

**2EME SESSION EXTRAORDINAIRE POUR 2010
27 ET 28 MAI**

**QUISTIONE A BOCCA POSTA DA SAVERIU LUCIANI
A NOME DI FEMU A CORSICA**

**OGGETTU : Pè a creazione d'un' Antenna Medica d'Urgenza (A.M.U.) in
Piaghja**

O Sgiò Presidente,

Sò parechje settimane ch'ella si pone di manera larga (eletti, medichi, paisani) a questione di l'urgenze in Piaghja, trà a Sulinzara è Aleria, è in e pieve di Fiumorbu, Castellu, Rogna è Verde.

Per contu nostru, avemu participatu à sta mossa è ancu cumunicatu à l'entre maghju per aiutà, quant'ellu si pudia, a dimarchja intrapresa da i piaghjinchi.

Dipoi, per via di a mubilisazione generale di a pupulazione, s'aprerà, à partesi da u 15 di ghjugnu, un Serviziu Medica d'Urgenza (AMU) in piaghja.

Ma à quelli chì pensanu ch'ellu ci vole à rallegrassi di stu primu passu, riguardu à a situazione pessima in stu duminiu di a salute publica dipoi tant'anni, noi altri, eletti di Femu a Corsica, dimu ch'ella hè era più chè ora.

Quandu chì tutte e regioni di l'isula sò pruviste inquant'à i mezi sanitari, eccu chì in Piaghja, ci hè vulsutu evenimenti drammatici per ghjunghjene à strappà qualcosa.

Fattu si stà chì ciò ch'ellu si prupone oghje ùn basterà micca per assicurà un serviziu à paru à ciò ch'elli anu l'altri Corsi. Ciò ch'ellu s'aspetta in i nostri paesi, ciò ch'elli aspettanu i 20.000 abitanti di a Piaghja, ùn hè micca un SMUR per 4 mesi. Per faccila corta, sta prima tappa ci cumanda di cuntinuà è d'andà più luntanu, ver di una suluzione durevule.

Chì ne serà di u SMUR francatu u 15 d'ottobre ? Hè bella ch'è capita ch'ellu ci vole chì u Statu è l'ARS pigliinu e so rispunsabilità. Ùn bastanu e misurelle di pettu à u disertu. U scopu, ch'elli a capischinu, serà di perenizà l'impiantu creatu, è di piglià senza tricà troppu a decisione di stallà in Ghisunaccia un' Antenna Medica d'Urgenza.

I Corsi di a ruralità piaghjinca è muntagnola, adilà di u casu chì ci tocca oghje anu bisognu di campà in un territoriu paru à l'altri. Hè una primura legitima, ma hè soprattuttu un dirittu. Puru s'è st'assemblea ùn hà a cumpetenza in u duminiu, à i so eletti li tocca à rivindicà, di manera chjara è unita, sta struttura chì tutta a ghjente aspetta.

Intantu, O Sgiò Presidente, vi dumandemu s'è v'avete a vuluntà pulitica di sustene sta dimarchja mettendu in via una cummissione di travagliu è di cuurdinazione permanente è ufficiale trà l'Agenzia Regiunale di a Salute è l'eletti di a Corsica ?

À ringraziavvi.

